

Kerajaan Akan Lancar Rumah Bawah RM220,000 Julai
mStar online
Mei 7, 2011

PETALING JAYA: Kerajaan akan melancarkan program baru iaitu Rumah Mampu Milik Berkualiti melalui Skim Rumah Pertamaku bagi membantu golongan muda di Lembah Klang mempunyai rumah sendiri selewat-lewatnya Julai ini.

Perdana Menteri, Datuk Seri Najib Tun Razak berkata, melalui program tersebut, kos rumah untuk Skim Rumah Pertamaku ialah RM220,000 ke bawah bagi golongan muda yang berpendapatan kurang RM3,000 sebulan.

Najib membuat pengumuman tersebut ketika bersiaran bersama penyampai radio stesen radio, Hot FM di sini pada pagi Jumaat.

Menurutnya, beliau mengambil maklum bahawa bukan mudah untuk mendapatkan rumah yang berharga RM220,000 di Lembah Klang berdasarkan komen yang diperoleh daripada laman web sosial Facebook nya dan media.

Najib berkata inisiatif terbaru itu akan dilaksanakan dengan kerjasama kerajaan dan syarikat swasta.

"Kalau boleh, tiada keuntungan akan diambil daripada projek ini. Pemaju akan melaksanakan tanggung jawab sosial korporat," ujarnya.

Jelasnya, akan dilaksanakan selepas kerajaan dapat mencari tapak perumahan yang sesuai.

Skim Rumah Pertamaku diumumkan oleh Perdana Menteri ketika membentangkan Belanjawan 2011.

Ia dilaksanakan bagi membantu golongan muda yang baru bekerja dengan pendapatan kurang daripada RM3,000 sebulan untuk memiliki rumah.

Skim itu akan menawarkan jaminan kerajaan ke atas bayaran pendahuluan sebanyak 10 peratus bagi harga rumah di bawah RM220,000.

Hakcipta Terpelihara © 1995-2011 [Star Publications \(Malaysia\) Bhd](#) (Co No 10894-D).

Source: http://mstar.com.my/berita/cerita.asp?file=/2011/5/7/mstar_berita/20110506105523&sec=mstar_berita